

Meeqqat atuarfianni pisortat, ullumikkut piumasaqaataareersut saniatigut, pisortaa sinnaanissaminut atuarfinni pisortatut ilinniagaqarsimanissaannut piumasaqaateqarnissaq pillugu Naalakkarsuit siunnersuummik suliaqaqqullugit peqquneqarnissaannik siunnersuut. Piumasaqaat ilinniartitaanikkut aaqqissuusseqqinneq aallartinneqarsimasoq eqqarsaatigalugu meeqqat atuarfiat pillugu inatsisartut siunnersuutissatut naatsorsuutigineqartumut kingusinnerpaamik ilanngunneqassaaq.

(Inatsisartunut ilaasortaq, Sofia Geisler, Inuit Ataqatigiit)

Akissuteqaat

(Ilinniartitaanermut, Kultureqarnermut, Ilageeqarnermut Nunanullu Allanut Naalakkarsuisoq)

Siullermeerinnineq

Naalakkarsuisut Sofia Geisler, Inuit Ataqatigiit, aalajangiiffissatut siunnersuutaanut qutsavigaat.

Naalakkarsuisut siunnersuusiortoq isumaqatigaat, atuarfinni piukkunaateqarluartunik pisortaqarnissaq piumasaqaataasariaqartoq, meeqqat atuarfiata nukittorsartuarnissaa inersartuarnissaalu pissappata. Naalakkarsuisut pingaartitaannut ilaavoq pitsaanerusumik meeqqat atuarfeqalernissaq, pitsaanerusunik angusaqartumik, taamaasillunilu inuusuttut amerlanerit meeqqat atuarfianniit naammassereermermi toqqaannartumik ilinniarfinnut allagartartaarutaasinnaasunut ingerlaqqittarniassammata.

Atuarfimmik aqutsisuuneq suliassaavoq tamatigoortuullunilu imaannaanngitsoq. Atuarfiup pisortaata perorsaanikkut, allaffissornikkut sulisunullu tunngasunut aqutsinissaq sapissanngilaa. Atuarfiup pisortaa aamma kaammattuisinnaassaaq, ataatsimoortitsisinnaassaaq aaqqiagiinngissuteqartoqartillugulu aaqqiissuteqarsinnaasuussaaq. Ulluinnarni sulinermini atuarfiup pisortaa susasaqartunut attaveqartuassaaq, soorlu atuartunut, angajoqqaanut, ilinniartitsisunut, politikerinut inuussutissarsiortunullu, taakkummi assigiinngitsutigut atuarfiup ingerlanneqarneranut piumasaqaateqartarput, tamakkulu atuarfiup pisortaata naammassiniartartussaavai. Pisortatut inissisimaneq pisortaanissamullu piginnaasaqarluarneq tamatigut pigineqareertuaannanngilaaq, pisortaanerlu ilinniartitsisunngorniarnermi ilinniarnermi sammineqartarani. Taamaamat pisariaqarpoq piginnaasaqalernissamut inerisaasoqarnissaa.

Atuarfimmi pisortassatut ilinniarneq kajumissuseq tunngavigalugu maanna ingerlanneqartarpoq, atuarfiullu pisortaa piumassuseqartoq, piffissaqartoq, kiisalu nukissaqartoq, atuarfimmi pisortatut sulinermini saniatigut ilinniaqqissinnaavoq. Diplomitut ilinniarneq ukiunik pingasunik sivisussusilik Ilinniartitsinermik Ilisimatusarfimmi ingerlanneqartarpoq, 60 ECTS point-inik nalilerneqarluni. Taassuma saniatigut Ilinniartitaanermut Aqutsisoqarfiup kommunit suleqatigalugit atuarfimmi pisortatut atorfinerlaanut pikkorissaanissamik neqeroorteqartarpoq. Pikkorissarnerit taakkutaaq kajumissutsimik tunngaveqarlutik ingerlanneqartarput.

Aalajangiiffissatut siunnersuummi siunertarinearpoq, kingusinnerpaamik maanna misissuisoqarnerani inerisaasoqarneranilu, atuarfiup pisortaannut atuarfiup pisortaanut ilinniagaqarnissaq inatsisitigut piumasaqaataalissasoq.

Ilinniartitaanermut, Kultureqarnermut Ilageeqarnermullu Naalakkersuisoqarfik kommunillu akornanni oqaloqatigiittoqarpoq, Naalakkersuisut Ilinniartitaanermut Pilersaarutaata annertusarnissaa pillugu, taamaasiornikkut kommunit ilinniartitaanermut pilersaarutaat ilanngunneqartaleriassammata, nuna tamakkerlugu ilinniartitaanermut pilersaarusiaqalernissaq anguniarlugu. Naalakkersuisut suliniutigissavaat atuarfiup pisortassaattut ilinniartaleriissaq pilersaarummi pingaarutilittut inissinneqassasoq. Oqaloqatigiinnerit maanna ingerlasut Ilinniartitaanermut pilersaarutini itisiliinermik ilaqassapputtaaq, piginnaasaqalernissamut suliniutip sumi ingerlanneqarnissaanut tunngatillugu. Taamaammata Naalakkersuisut maannakkut, meeqqat atuarfianni pisortatut ilinniagaqarnissamut piumasaqaat kissaatiginngilaat.

Naalakkersuisut kommunit, Ilinniartitsinermik Ilisimatusarfik - Ilisimatusarfiup ataaniittoq, ilinniartitsisut kattuffiat immaqalu susassaqtartut allat oqaloqatiginerat ingerlatiinnassavaat, qanoq atuarfiup pisortaanut piukkunnarsaasoqarsinnaanerata pilersaarusiortoqarsinnaanera pillugu, kiisalu atuarfiup pisortaanut piginnaasassatut piumasaqaatit qanoq ittuussanersut qulaajarnerinut. Piumasaqaatit misissueqqissaarnermut inerisaanermullu "Ilinniartitaanerit ataqatigiissumik eqaatsumillu aqqissuussat"-mut tulluarsagaassaapput.

Tamanna tunngavigalugu Naalakkersuisut aalajangigassatut siunnersuutip itigartinneqarnissaa innersuussutigaat.